

Bosna i Hercegovina
Federacija BiH
Kanton Sarajevo
Skupština Kantona Sarajevo
n/p gđa Ana Babić, Predsjedavajuća

VLADI KANTONA SARAJEVO
SVIM MINISTARSTVIMA (za javne ustanove iz njihovih resora)
SVIM OPĆINAMA U KANTONU SARAJEVO

ZASTUPNIČKA INICIJATIVA

S obzirom da sam već u dva navrata (na 20. i 24. Radnoj sjednici Skupštine Kantona Sarajevo) upućivala zastupničku inicijativu Vladi Kantona Sarajevo, da pokrene aktivnosti koje će osigurati pravo prednosti u javnim ustanovama u Kantonu Sarajevo, bez čekanja u redu, za osobe sa težim invaliditetom i roditelje /staratelje djece sa poteškoćama u razvoju, te do danas dobila samo očitovanje Ministarstva zdravstva Kantona Sarajevo, koje je inicijativu ocijenilo opravdanom i poduzima aktivnosti na sprovođenju iste, ovim putem ponavljam inicijativu koju adresiram **svim ministarstvima**, za javne ustanove iz njihovih resora, uz kraće obrazloženje.

Naime, jedan od mnogobrojnih problema sa kojima se svakodnevno susreću porodice djece s poteškoćama u razvoju i osoba sa težim invaliditetom je izvršavanje obaveza izvan kuće, a koja uključuju javne ustanove (posjeta doktoru, prikupljanje i ovjeravanje dokumentacije, ovjeravanje zdravstvene knjižice, javljanje na Zavod za zapošljavanje, plaćanje računa itd). Sve ove radnje same po sebi podrazumijevaju duge redove, te iziskuju sate odvojenog vremena za iste.

Da bi, npr., roditelj djeteta s poteškoćama u razvoju obavio nešto od navedenog, neophodno je organizovati pomoć nekog bliskog, da za to vrijeme ostane s djetetom. U težem su položaju porodice koje nemaju ovakvu podršku, pa se dešava da su primorani povesti dijete sa sobom. U tom slučaju, dijete s poteškoćama u razvoju, obzirom na posebne potrebe, arhitektonske barijere, gužve i duge redove, dolazi u nepovoljan položaj.

Naravno, ne postoji čarobni štapić koji bi ovim porodicama riješio probleme, ali mali korak ka tome je i ova inicijativa, putem davanja prednosti porodicama djece s poteškoćama u razvoju i osobama sa invaliditetom u javnim ustanovama, i na taj način skraćivanjem vremena potrebnog za izvršavanje neophodnih obaveza. U općinama, ambulantama i ostalim javnim ustanovama postoje natpisi po kojim prednost imaju RVI, šehidske porodice, trudnice, pa predlažem da se uz ove grupe **jasno i transparentno** istakne i pravo prednosti za osobe sa invaliditetom i porodice djece sa poteškoćama u razvoju.

Molim da se navedena inicijativa dostavi i **svim općinama u Kantonu Sarajevo**, na razmatranje i, nadam se, usvajanje.

Sarajevo, 22.03.2017.

Zastupnica u Skupštini Kantona Sarajevo

Neira Dizdarevic